

鞏縣志卷之十九

鞏縣知縣李述武纂修

藝文志下

賦

魏

洛神賦有序

曹植

黃初三年余朝京師還濟洛川古人有言斯水之神曰宓妃感宋玉對楚王神女之事遂作是賦其詞曰

余從京師言歸東藩背伊闕越轅轅經通谷陵景山日既西傾車殆馬煩爾乃稅駕乎蘅皋秣駟乎芝田容與乎楊林流盼乎洛川

於是精移神駭忽焉思散俯則未祭仰以殊觀觀一麗人於巖之
畔迺援御者而告之曰爾有覩於彼者乎彼何人斯若此之艷也
御者對曰臣聞河洛之神名曰宓妃然則君王所見也無迺是乎
其狀若何臣願聞之余告之曰其形也翩若驚鴻婉若游龍榮曜
秋菊華茂春松髣髴兮若輕雲之蔽月飄飄兮若風流之迴雪遠
而望之皎若太陽升朝霞迫而察之灼若芙蕖出綠波濃纖得中
修短合度肩若削成腰如約素延頸秀項皓質呈露芳澤無加鉛
華不御雲鬢莪莪修眉連娟丹脣外朗皓齒內鮮明眸善睐鬢輔
承權 姿艷逸儀靜體閒柔情綽態媚於語言奇服曠世骨像應
圖披羅衣之璀璨兮珥瑤碧之華琚戴金翠之首飾綴明珠以耀

軀踐遠遊之文履曳霧綃之輕裾微幽蘭之芳藹兮步踟躕於山隅於是忽焉縱體以遨以嬉左倚采旄右蔭桂旗攘皓腕於神滄兮采湍瀨之元芝余情悅其淑美兮心振蕩而不怡無良媒以接懽兮託微波而通辭願誠素之先達解玉珮以要之嗟佳人之信修羌習禮而明詩抗瓊瑋以和予兮指潛淵而爲期執眷眷之歎實兮懼斯靈之我欺感交甫之棄言兮悵猶豫而狐疑収和顏而靜志兮申禮防以自持於是洛靈感焉徙倚徬徨神光離合乍陰乍陽竦輕軀以鶴立若將飛而來翔踐椒塗之郁烈步蘅薄而流芳超長吟以永慕兮聲哀厲而彌長爾乃衆靈雜邃命儔嘯侶或戲清流或翔神渚或采明珠或拾翠羽從南湘之二妃携漢濱之

遊女嘆匏瓜之無匹詠牽牛之獨處揚輕桂之綺靡翳修袖以延佇體迅飛鳧飄忽若神凌波微步羅襪生塵動無常則若危若安進止難期若往若還轉盼流精光潤玉顏含辭未吐氣若幽蘭華容婀娜令我忘餐於是屏翳收風川后靖波馮夷鳴鼓女媧清歌騰文魚以警乘鳴玉鸞以偕逝六龍儼其齊首戴雲車之容裔鯨鯢踊而夾轂水禽翔而爲衛於是越北沚適南崗紆素領迴清揚動朱唇以徐言陳交接之大綱悵神人之道殊怨盛年之莫當抗羅袂以掩涕兮淚流襟之浪浪悼良會之永絕兮哀一逝而異鄉無微情以效愛兮獻江南之明璫雖潛處於太陰長寄心於君王忽不悟其所舍悵神霄而蔽光於是昔下陵高足往神留遺情想

像顧望懷愁冀靈體之復形御輕舟而上泝浮長川而忘返思綿綿而增慕夜耿耿而不寐霑繁霜而至曙命僕夫而就駕吾將歸乎東路攬騁轡以抗策悵盤桓而不能去

按陳王賦乃離騷美人之遺文選注思甄事諷辯詳何義門批本

晉

懷舊賦

潘岳

余十二而獲見於父友東武戴侯楊君始見知名遂申之以婚姻而道元公嗣亦隆世親之愛不幸父子凋殞余既有私艱且尋役於外不歷嵩邱九年於茲矣今而經焉慷慨懷舊而賦之啟開陽而朝邁濟清洛以徑渡晨風淒以激冷夕雪嵩以掩路轍含水以滅軌水漸輒以凝洹塗艱屯其難進日晡晚而將暮仰晞

歸雲俯鏡泉流前瞻太室旁眺嵩邱巖巖雙表列列行樹既興慕於戴侯亦悼元而哀嗣墳纍纍以接隴栢森森以攢植何逝波之相尋會舊草之未異念總角而獲見承戴侯之清塵名余以國士眷余以嘉姻自祖考而隆好迷逮二子而世姻親懽携手以偕老庶報德之有鄰今九載而一來空館闐其無人陳芟被於堂除舊圃化而為薪步庭廡以徘徊涕流泫而沾巾宵輾轉而不寐驟長嘆以達晨獨鬱結其誰語聊綴思於斯文

唐

神龜負圖出河賦

以作瑞前王始啓文教為韻

裴度

茫茫積流祚聖有作動上天之密命假靈龜以潛躍蓋欲以慶遙

源敷景鑠寫物象之精密化人物之朴略豈不以河之德兮靈長
龜之壽兮會昌載正符先早於古帝稱大寶後遺於寧王故將出
也感天地動陰陽浮九折之澄碧散五色之榮光然後蹈箭流而
泳花浪露元甲而明繡裳初若沉圓璧而未沒稍似泛孤鳥而欲
翔既而降芳蓮蹈清沚五老游而共睹列聖過而每喜出朝日如
濯其寶圖伏靈壇狀陳其鏤籒布爻象之糾紛蘊天地之終始負
謀謨之畫將化洪荒當授受之時豈思綠水非臆對之可述諒鉤
深而有致所以出河宗作天瑞馮夷倚浪以相送神魚鼓舞而旋
避於戲冥數宵然自我而傳外骨明賁中心善泉將後天而思永
豈爲贊而居前至如魚託素以達情鳳銜詔而展禮未若祥開八

卦兆動四體闡文教寧木鐸之足儔贊貞明與日月而同啓洎乎
形貌既著品物類分榮萬化之茫昧合一氣之網緼識用光於夏
葉絲每煥於義文此乃天理用彰神道設教故躍波而委質殊以
文而飾貌觸綸誠怪於文鱗隱霧徒嗟乎元豹此悠久也可是則
而是效

按賦題本緯書而五老列聖等語則用鞏河洛
壇故寔與永寧孟津圖書異故登之

國朝

鞏遊賦

有序

諸正達

康熙戊子歲冲霞多世兄令鞏邑余貽書云余將登覽嵩高洲
洄河洛極宇內之壯觀盡生平之快事今庚寅歲六月竟至矣
欲酬夙言遂舉然有高望之想觸目所形率爾成賦其辭曰

自發軔乎皖城日驅驟於隴陌紛倭遲以千里漸辭南而入北繫曠野之茫茫悵凝眸其何極旋陔谷而陟岡遙層巒之遞逼榮波宛丘耳其名知爲陳鄭之舊域曩對簡而神遊今踐乎余之轍跡爲詢鞏封原歟嚙歟指彼嶺岵中即其區杖策赴之稅於東關馬煩車殆翼日以閑月六初吉乃謁賢宰禮數優崇意氣和豈倦寤之餘繙厥邑志崇山廣河繪於圖序余情不能已將歷覽而考其實焉於是踞虎頭躡龍尾履巉巖躋嶺嶺條目眩而心駭惟嵩高之奇偉巋巋峻嶒少室相對拱恒霍而擁岱華巍然天地之中位孕靈秀於洪濛發乾坤之怪秘握元樞以成尊遂雲透而波逝聖賢挺以蔚興畿都錯其壯麗自周漢以迄宋唐皆鍾毓乎此氣百

極荒微尾與洛連翔舞鸞騰是曰邙山矯如蒼虬之浮空俯若翠峴之飲川展雲蓋兮嶢嶢建雲標兮軒軒詎懾岳靈之尊威實障紫微之屏垣北枕河流中貫伊洛伊西迤而與洛交洛北匯而與河合黎陽大邙之野彌望北流之活活帝王之興河洛先溫寒逾九日五色繽紛堯帥諸侯沉璧於濱元龜負書綠字赤文龍馬臨壇文吐列星舜受神書玉檢金繩青雲浮度熒光晶熒凡膺圖而受瑞惟二川之效靈所稱虎牢之關成臯之塞昔爲新鄭之藩今屬邑東之界山綿綿其若鎖水盈盈而如帶嚴固閉密阨塞要害宜赤帝之據險使重瞳之困憊惜乎千紅洛口莫覩錦繡之粧萬柳神隄罕見翠螺之黛西眺孤峯高秀不羣紫金曜日青堆暎雲

五枝析嵩山之脉轆轤驚修坂之名然而蒼莽之間宋陵在焉匪
鬱葱之佳氣盡迷斷之凄烟金匱玉匣莫閔幽泉錮南山猶有隙
念及此而永嘆大抵瀆宗維河嶽宗維嵩鞏雖渺矣彈丸適當乎
二宗之中固四塞險隘之區亦千載戰爭之衝嗚呼余徘徊而延
佇竊憑今以弔古欲追希乎前人將歌哭其誰語顧洪流之奔駛
慨然想見禹之明德遠矣訪桑林之故墟商王六事之禱猶存乎
膠鬲迎鮪水之師而卜周之興於西惠公錫子般之封而嘆周之
衰於東黑石之水潺湲膺秦同舟而若仙回郭之野追遙汾陽封
寡以平妖秋風明月緱山子晉之笙若近若遠春雨微波洛水宓
妃之神若隱若現荆榮孝義之村芝秀榜元之田玉川之書船可

識少陵之詩魂黯然魏公殘壘孤雲欲墮劉武荒堡茂草誰芟而
况秦險首什谷之口阿房炬而一卒莫守隋富誇洛口之倉迷樓
毀而粒粟莫嘗嗟乎哉洪爐同鑄孰大孰細巨鼇共負誰夸誰阻
睇曦馭其如蟻兮騰萬馬而莫追容撓不能紀其歷兮劫灰蕩於
須臾牧跛羊於泰山之上兮藏太行於康衢折鈎喙以爲九鼎兮
封函關於丸泥此老氏幻無名以爲母莊生糅物論而欲齊者也
嘆混闢之轉瞬識平傾之迭移觀晝夜之不舍悟逝者之如斯余
將陟介丘之崇巔溯巨瀆之河紆探混芒於誰鑿尋真源其何歸
豈獨宇內之大觀盡是五嶽之壯遊始茲感不罄於余懷爰登高
而賦之

詩

上古

錄圖文

(河圖擬輔佐)黃帝游於河洛至澤鴻之泉有大鱸魚負圖以授帝蘭葉朱文名曰錄圖○一作錄圖

渾渾噶噶焚焚雉雉與物俱化

陶唐

雒璧書

(尚書中侯)帝堯率羣臣東沉於雒刻璧書云

天子臣放勛德薄施行不元

元善也

夏

五子歌五章

(夏書)太康尸位以逸豫厥德黎民咸貳乃盤游無度畋於有洛之表有窮后羿因民弗忍距於河厥弟五人御其母以從後於洛之泗五子

咸怨述大禹之戒以作歌

掌縣志

第六册

卷之十九

藝文下 七

河南商務印刷所印

皇祖有訓民可近不可下民惟邦本本固邦寧予視天下愚夫愚婦一能勝予一人三失怨豈在明不見是圖予臨兆民慄乎若朽索之馭六馬爲人上者柰何不敬訓有之內作色荒外作禽荒甘酒嗜音峻宇雕牆有一於此未或不亡

惟彼陶唐有此冀方今失厥道

左傳

亂其紀綱乃底滅亡明明我

祖萬邦之君有典有則貽厥子孫

叶

關石和鈞王府則有荒墜厥

緒覆宗絕祀

叶養里反

嗚呼曷歸予懷之悲萬姓仇予予將疇依鬱陶乎予心顏厚有怙
惓弗慎厥德雖悔可追

商

桑林禱辭

(荀子大畧篇)湯之時大旱七年剪髮斷爪以身為犧牲禱於桑林之野以六事自責曰何不雨至斯極也言未已大雨

政不節與使民疾與官室崇與婦謁盛與苞苴行與讒夫興與山節

叶即盛叶成視川教之祝云云

漢

太學中謠

八顯之一

天下英藩尹伯元

尚書令河南鞏尹勳

晉

在懷縣作

選一首

潘岳

我來冰未泮時暑忽隆熾感此還期淹嘆彼年往駛登城望郊甸遊日歷朝寺小國寡民務終日寂無事白水過庭激綠槐夾門植

鞏縣志

第六册

卷之十九

藝文下 八

河南商務印刷所印

信美非吾土祇攪懷歸志眷然顧鞏洛山川邈離異願言旋舊鄉長此簡書忌祇奉社稷守恪居處職司

選文

鞏道迎駕

潘尼

南山鬱岑峯洛川迅且急青松蔭修嶺綠繁披廣隰朝日順長途夕暮無所集歸雲乘幘浮淩風尋帷入道逢深識士舉首對吾揖世故尚未夷嶠函方險澁狐狸夾雨轅豺狼當路立翔風嬰龍檻騏驥見維繫俎豆昔嘗聞軍旅素未習且少停君駕徐待干戈戢

選文

唐

洛

李嶠

九洛韶光媚三川物候新花明丹鳳蒲日映玉鷄津元禮期仙客
陳王觀麗人神龜方錫瑞綠字重來臻粹文

鞏城南河作寄徐三景暉

儲光義

初年雨候遲鞏洛河流小搖搖芳草岸屢見春山曉清露洗雲林
輕波戲魚鳥唯言故人遠不念鄉川眇舟楫去滌迴湍激行奔峭
寄書千里路莫道南鴻少

鞏城東庄道中作

儲光義

北陵散寒鳥西山照初日婉變晉陽京踟躕野人室南軒草間去
後乘林中出靄靄長路暖遲遲狹路歸蟬蟬時蔽月枳棘復傷衣
城上東風起河邊早雁飛夏王紀冬令殷人乃正月涯口度新雲

山陰留故雪幸逢耆叟話餘待親隣別總轡出叢薄歇鞍登峻隅

春源既蕩濟伏戰亦睢盱未獲遵平道徒言信薄夫以上本集

尋鞏縣南李處士別業

岑參

先生近南郭茅屋臨東川桑葉隱村戶蘆花映釣船有時著書暇
盡日牕中眠且喜閭井近灌田同一泉

送孟十二倉曹赴東京選

杜甫

君行別老親此去苦家貧藻鏡留連客江山顛顛人秋風楚竹冷
夜雪鞏梅春朝夕高堂念應宜綵服新工部集

遊石竈寺

劉滄

苦徑縈迴景漸分愴然空界靜埃氛一聲疎磬過寒水半壁危樓

隱白雲雪下石龕猶在定日西山木鳥成羣幾來吟嘯當朱檻風起天香處處聞

白鞏河舟行入黃河卽事

寄府縣寮友

韋應物

夾水蒼山路向東東南山豁大河通寒樹依微遠天外夕陽明滅亂流中孤村幾歲臨伊岸一雁初晴下朔風爲報洛橋遊宦侶扁舟不繫與心同

雜言寄杜拾遺

任華

杜拾遺名甫第二才甚奇任生與君別來已多時何嘗一日不相思杜拾遺知不知昨日有人誦得數篇黃絹詞吾怪異奇特借問果然稱是杜二之所爲勢攫虎豹氣騰蛟螭滄海無波似鼓蕩華

岳平地欲奔馳曹劉俯仰慙大敵沈謝逡巡稱小兒昔在帝城中盛名君一個諸人見所作無不心膽破郎君叢裏作狂歌丞相閣中嘗醉臥前年黃帝歸長安承恩闊步青雲端積翠扈遊匝披香寓直月團奕英才特達承天眷公卿無不相欽羨只緣汲黯好直言遂使安仁却爲掾如今避地錦城隅幕下英僚每日相就

刻云就一作隨

提玉壺半酣起舞將髭鬚乍底乍昂旁若無古人制禮但爲

防俗士豈得爲君設之乎而爲不飛不鳴亦何以只待朝廷有知已已曾讀却無限書拙詩一句兩句在人耳如今看之總無益又不能崎嶇傍

原刻云傍一作倚

朝市且嘗畊稼豈得便徒爾南陽諸葛爲朋

友山東謝安作隣里間嘗把棊弄悶即提樽起鶯啼二月三月時

花發千山萬山裡此時幽曠無人知
火急將書憑驛使爲報杜拾遺

酬李相公喜歸鄉國自鞏縣夜泛洛水見寄

劉禹錫

鞏樹煙月上清光含碧流且無三已色猶泛五湖舟
鵬息風還起鳳歸林正秋雖攀小山桂此地不淹留

全唐詩

鞏路感懷

呂溫

馬嘶白日暮劍鳴秋氣來我心浩無際河上空徘徊

宋

題鞏縣西門周襄王廟

人來人去市朝變山後山前煙霧凝縈帶二川河洛水寂寥千古

帝王陵

王荆公詩註

永昭陵挽詞三首

歐陽修

與子雖天意知人昔帝難一年謀早定九鼎勢先安
大舜仁由性成湯治以寬孤臣恩未報清血但沈瀾

干戈不用臻無事朝野多歡樂有年便坐看揮飛白筆侍臣新和
栢梁篇衣冠忽見藏原廟簫鼓愁聞向洛川寂寞秋風羣玉殿還
同恍惚夢鈞天

行殿沉沉畫髮重凄凉挽鐸出深宮攀號不悟龍胡遠侍從猶穿
豹尾中日薄山川長起霧天寒松栢自生風斯民四十年涵煦耕

鑿安知荷帝功

歐公全集

續作永昭陵挽詞四首

歐陽修

王者居尊本無外由來天下以爲家六龍白日乘雲去何用金錢
貢道車

苦霧霏霏著綵旗猶排吉仗雜凶儀嘗時鳳輦行遊處今日龍輶
動哭隨

都人擾擾塞康莊西送靈車過苑墻金鼎藥成龍已去人間惟有
鼠拖腸

素幕悠悠逗曉風行隨哀挽出深宮妃嬪莫向蒼梧望雲覆昭陵

洛水東

歐公全集

鞏縣志

第六册

卷之十九

藝文下

十二

河南商務印刷所印

鞏縣初見黃河

歐陽修

河決三門合四水徑流萬里東輸海鞏洛之山夾而峙河來鬻山
作沙觜山形迤邐若奔避河益汹汹怒而訾舟師弭楫不以帆頃
刻奔過不及視舞波淵旋投沙渚聚沫倏忽爲平地下窺莫測濁
且深癡龍怪魚肆憑恃我生居南不識河但見禹貢書之記其言
河狀鉅且猛驗河質書信皆是昔者帝堯與帝舜有子朱商不曉
嗣皇天意欲開禹聖以水病堯民以潰堯愁下人瘦若臘衆臣薦
絲帝曰試試之幾載功不效遂殛羽山慙而斃禹羞父罪哀且勤
天始以書畀於姒書曰五行水潤下禹得其術因而治鑿山疏流
浚賦滄分孽枝派有條理萬邦入貢九州宅生人始免生鱗尾功

深德大夏以家施及三代蒙其利江海淮濟洎漢沔豈不浩渺汪
而大收波卷怒畏威德萬古不敢肆凶厲惟茲濯流不可律歷自
秦漢猶爲害崩堅決壅勢益橫斜跳旁出惟其意制之以力不以
德驅民就溺財隨弊蓋聞河源出崑崙其山上高大無際自高瀉
下若激箭一曲一直一千里湍雄衝急乃迸溢其勢不得不然爾
前歲河怒驚滑口漫激洋洋淫不止滑人奔走若鋒駭河伯視之
口爲戲呀呀怒口缺若門日啖薪石萬萬計明堂天子聖且神悼
河不仁嗟曰喟河伯素頑不可令至口一感惶且畏引流辟易趨
故道閉口不敢煩官吏遵途率職直東下咫尺莫可離其次爾來
歲星行一周民牛飽芻拜羨費滑人居河飲河流耕河之墟浸河

潰嗟河改因作民福嗚呼明堂聖天子

歐文全集

遊石子澗

歐陽修

巖巖高亭古澗隈偶携佳客共徘徊
席間風起聞天籟雨後山光入酒杯
泉落斷崖衝豁響花藏深崦過春開
麈尾禽鳥莫驚顧太守不將車騎來

文忠集

轅轅道

梅堯臣

絕險稱漢關晨躋瞻二室盤紆石路回
迤邐雲峯出古壁挂青蒼天風起蕭瑟
洛城回首時望望平烟密

送直講吳殿丞宰鞏縣

王安石

青嵩碧洛曾遊地墨綬銅章忽在身
擁馬尙多畿甸雪隨衣無復

禁城塵古來學問須行已此去風流定慰人更憶少陵詩上語知君不負鞏梅春

出鞏縣

王安石

昭陵落月煙霧昏篝火度谷行山根投鞭委轡涉數村寤出鞏縣城東門向來宮闕不可見但有洛水流渾渾

書任村馬舖

王安石

兒童繫馬黃河曲近岸河流如可掬任村炊米朝食魚日暮滎陽驛中宿投老經過身獨在當時洲渚今平陸秣黍冥冥十數家仰視荒蹊但喬木冰盤鱸美客自知起看白水還東馳爾來百口皆年少歸與何人共此悲

以上臨川集

渡洛因泛丹東下數里頗意淮上

張來

云江清洛轉山隈渺渺東流不復回輕鳥竟隨青嶂去亂波爭泛夕陽來偶驚舟楫鄉心起乍脫塵埃病眼開疑是盱眙郭門外月明帆席過清淮

宛邱集

金

石窟寺

牛承直 邑令

老去尋山意漸便興來登覽獨怡然僧歸禪榻香凝帳人喚漁舟晚濟川清洛冷光浮巨棟靈崧積翠拱中天公餘底事頻來此民遠官刑不用鞭

石刻

明

鞏洛道中

薛瑄

高高雲氣晚嵯峨清洛西風响急波水色山光渾似舊宋家陵墓

夕陽多舊志

題宋復古鞏洛圖

謝徽

青山鞏洛舊林園彷彿昇平古意存雨外人歸秋葉浦煙中鳥下
夕陽村昔年題字宸光合今日披圖野興繁風景西湖仍不異惟
餘故老說中原明詩綜

石窟寺

張綬府尹

野寺枕清洛古像鑿崖石軒窗眇空曠樓閣恍金碧僧多龕富居
門爲嵩少闢我來值秋晚高下窮勝蹟萬籟息衆竅千花紛講席

乘輿宿禪房梵音徹寒夕

弔杜公墓

陳獻章

裸葬不葬等悠悠有生無生名可留壽遲殤子千年在文與江河
萬古流天借人心照日月山藏廟貌自春秋拾遺苦被蒼生累羸
得乾坤不盡愁

黑石渡

于範

山足灤清波渡頭枕黑石野花學菊黃山東如丹赤高岸穿山過
深溝落葉集雲靜正秋空出門雙眼碧

韓烈婦節義歌

王冕洛陽進士

節義宏剛天地窄凜凜生風薄日月人生萬古皆有死惟有風霜

不忍折恥向醜虜馬下休而今僅見誇中州此血寧作劍上紅此
顏不肯向人污怒氣直上冲碧霄化作長虹萬里耀須臾天地無
顏色百萬英雄稱且嗟至今城下義魂咽猶是當時對刃決死生

經少陵墓

周叙

杜陵詩客墓遙倚北邙巔斷碣居人識高名信史傳猿聲悲落照
樹色翳寒烟惟有文章在輝光夜燭天

洛口驛

失名

驛古人初靜林深夜倍清寒蛩引鄉泪歸雁帶邊聲明月知心事
青山減宦情馳驅何日了溫飽愧生平

舊志

石窟寺

蔡浦分府

二月十七郊外行嵩山洛水眼分明已勞地主盤餐薦更遣山僧
管齋迎緣磴酣歌春日暮凭闌擊日晚風清酒情不盡登臨興月
印灘頭一艇橫

慈雲寺

趙迎

昔我登山未盡頭此心鬱鬱幾經秋重過溪澗酌前志再陟巉崑
繼舊遊接地風雲隨我轉連天景色許誰收危峰絕頂堪舒目得
句敢云家倚樓

石刻

送周編修代祭宋陵

王直

函香分祀宋諸陵使節皇華寵渥承河水遠通平野外嵩山高處
亂雲層馬遷勝覽憐予病李白豪吟羨子能君到薇垣謝知己山

陰短棹興難乘

前題

王英

明庭秩祀降深恩詔遣詞臣出諫垣遠歷山川周濬邑肅陳俎豆
宋陵園御香滿路花爭發宮柳連堤日正殷最愛近陵諸父老攀
援羅拜擁行軒

市河橋

劉醇

尋芳策杖市橋前柳色垂金二月天宿霧纔開初出日經風又散
曉來烟沙汀燕子啣泥語蓼岸鴛鴦貼水眠尤勝瀟陵風景好一
川城郭翠微連以上縣志

國朝

鞏縣志

第六册

卷之十九

藝文下

十七

河南商務印刷所印

渡洛水

王士正

脉脉中流望盈盈羅襪塵西園魏公子南浦洛川神蘅薄芳猶在
楊林意未申凌波何處問秋水正魚鱗

宋陵

王士正

洛水邙山飽廢興宋家幽寢闕魚燈奉香不見臨安使白日茫茫
下七陵

七夕前二日鞏縣阻雨

王士正

大火西流日昇仙故跡存秋風來鞏洛暮雨阻轅轅欲把浮邱袂
難招杜甫魂神嵩不可眺三十六峯昏以上漁洋集

轅轅關放歌

田雯

五丁神力齊鬪強二室鑿破森開張宏窳洞壑立門戶下流洛水
奔洛陽車馬不從此地入途迷七聖風沙黃轆轤關自何代始崎
嶇磔确迴羊腸石子大者似石困小者彈丸如珠光禹行治水錯
伐鼓塗山氏女來相將野語創自淮南子搜神述異何謫狂五乳
峯嵐但咫尺山椒神漢紛低昂三素雲涌駁霞漏吹笙王子摩青
蒼天邪桃花路側塞翠莢天棘排兩行驚瀉聲搖緱氏嶺匹練飛
下金牛岡白髭老子游嵩客八風四扈來徜徉春山淡冶迎人笑
燕子戴勝鳴村旁便與洪崖採藥去手抄朮序長生方雲駢一駕
羣靈接上朝三十六玉皇

古歡堂集

黑石頭渡洛水

李因篤

古道長依洛前津始放船青泥通沃土黑石泛疎烟豆粥凌晨具
魚肪度地偏御風隨所適江海正悠然

受祺堂集

鞏洛道中書所見

湖海樓集

陳維崧

鞏洛饒陂陲水土互蟠結抉幽布險勢鑿孔露奇節重隳積屨屨
怪竅囊埽堞居民數百家伏處類巢穴村墟窳曠阮蕩宇補凹凸
批亢架桶染擣虛置櫺柁玲瓏勝鬼工妥貼儼地設乃知般循外
別自有巧拙東南一土嚙壁若昆刀切居者累彈丸縹緲詫奇絕
重樓俯鳥道甃隔岫蟻垤盤旋萬累紋雕樓百蟲齧盡室頗淳熙
聚廬復精潔噉咄雜童穉偃僂半耆耄嬌女曉塗抹瘦妻解補綴
春秋放鷄豚早晚閉門闌我顧居者言此境堪咋舌一朝秋雨塌

陵谷遭崩缺將毋愚公移或者龍火掣居者啼向我長跪對余說
前朝昔喪亂蛾賊起作孽秦隴跳銅脛楚豫潛草竊峩峩洛陽道
千里大流血白晝舞貔貅黃天恣饕餮妻孥飽刀鋸骸骨供菹醬
詎料寰宇清及見欃槍滅興亡祇轉瞬世事纔一瞥苟活幸至今
枯菟何區別我聞吳越間甲第金張列文椒塗不足更取都梁蕤
此疑太暴殄翻恐致蹉跎何如此間人任運無曲折飽飯過殘年
踏盡邙山雪

萼嶺

潘 耒

嵩嶺中開處關傳古轅轅時清無埃卒地勝有祇園嶽勢趨邙轉
河流帶洛翻烟村青不斷如掌見平原

遂初堂集

鞏縣

潘 耒

鞏洛東周隘經行險始知河流吞岸窄山勢壓城危勇豈投鞭渡
輕難並轡馳洛倉遺蹟在轉粟至今宜

遂初堂集

黑石渡

湯右曾

昨前邙山來今從邙山去邙山朽骨萬萬古惟有行人朝復暮黃
金蝕盡白石爛螻蟻三泉尙知處我來欲酌酒一盃落日荒荒下

前渡

懷情堂集

元日發鞏縣

看山四面碧嶙峋且免車中邑邑人殘雪未消前度臘寒梅已帶
乍回春老知時節心情減閒覺風花景物親二十年來兩元日天

門頂上洛河濱

丁丑元日舟次白沙
得登天門山絕頂

嚴子陵祠

呂履恒

霜落秋城木葉丹
客星祠畔肅衣冠
故人無意驕同臥
天子何能屈一官
嚴瀨江山空浩渺
原陵松柏自高寒
東都多少知名士
不及冥鴻一羽翰

黑石關

呂履恒

嚴關東望意蕭騷
石立山開見古濠
曉樹片帆回洛汭
霜天一雁下成臯
人家雨後黃沙靜
戰壘秋空白日高
底事棄繻猶履躋
三年重過問村醪

夢月巖集

黑石渡

劉青藜

朝發上東門
夕抵黑石渡
川原何逶迤
崗嶺莽回互
伊洛與瀍澗
派別齊東赴
匯流朝大河
羣山夾北注
側聞李郭儔
當年曾此聚
門龍舟亦仙
御榮渡還慕
名流矜氣節
義士爭馳騖
惜哉標榜盛
奇禍中黨錮
羣小焉足尤
諸公無乃固
遂俾國一空
炎運以不祚
我來千載下
俯仰空自顧
扣舷獨放歌
伊人不可晤

宋陵行

劉青藜

前有嵩高後北邙
伊洛縱橫盤中央
青龍掉尾紫金接
天水遺冢紛低昂
殿宇灰飛松楸盡
殘碑斷碣橫
夕陽伊昔東都全
盛日朝陵儀制何
煒煌金吾百里罷
傳呼黃麾仗絡鼎
湖傍素衣步入司
馬門百官麟次鳴
瓊琅歲時二仲奠
宗正冬衣捧獻來
嬪嬙七世

相沿成故事青城禍起殊淒涼懷感蒙塵瑯琊南翠微不守熊羆
亡驪山銀海九嶷匣摸金何代無中郎神臺墜裂特諱詞南山雖
錮得無戕十二金牌棄兩河獲陵劉湛空相償澗水流涸亦偶然
可憐父老夸貞祥五國遊魂置腦後含桃那問金粟岡轉眼崖山
颶風起蘭亭真帖尤堪傷冬青樹上靈禽飛法惠詩名遙祀復何望
雪晴日暖西京道昨朝夾馬今隋倉歷歷興亡在眼底臨風三嘆
獨傍徨回頭却憶陳橋驛黃袍擁戴日無光

杜少陵墓

劉青藜

萬里清明節回頭憶北邙可憐出巫峽曾永到襄陽故國三千里
羈魂二十霜蹉跎稷契志終古恨茫茫

登鞏縣南城樓

劉青藜

獨上城南百尺樓山川迴合古東周螭碑萬笏插龍尾雉堞千尋
跨虎頭洛口倉空餘故壘平津橋斷冷荒洲東風楊柳垂垂綠極
目斜陽動客愁高崑山人集

至鞏縣芝田鎮恭祀宋太祖太宗真宗仁宗四陵紀事並示

多明府

蔣

漣

翰林編修

秣馬息芝田地僻茅簷小籃輿行山中四圍青綠遶鬱鬱宋家陵
迴環勢相抱幽隊埋衣冠高原自昏曉斷碑臥蒼苔最屬伏衰草
石麟與翁仲或植或顛倒想見南渡前雙闕臺穹昊守冢環松門
泉宮秘深窈我來撫遺墟拜手酌清醪對越儼前王盤匱潔蘋藻

是時風日佳冠蓋出木杪盛典傳鄉閭聚觀走翁媪有令前致辭
承乏茲邑早每當恩詔宣山深集旃旒是歲輒有秋秋風足畦稻
答言令無疑此實神所保昔一祖三宗當陽臨億兆功德遞相承
百年遞肇造如文武成康精靈在豐鎬秩祀禮所宜豈徒事所禱
語罷立躊躇夕暉掛華表去去指前途明發滎陽道

芝田望嵩

蔣

漣翰林

編修

山居村聚小四面簇煙巒曉來呼僮捲布幔畫圖歷歷恣飽看太
室盤礴踞絕頂衆峰環立爭巒岼迷離暎靄極變態一一拔出青
雲端亭亭萬車蓋濯濯千琅玕山腰排比蒼翠滴荆扉隱見臨清
湍炊煙一線氣蓬勃得非西崦人家煮笋方朝餐須臾雲淨日斜

照但見碧綠青紅攢翠微遠望紛秀色陰崖想像春猶寒我聞洞
天第六神仙宅洞口平彝千里寬此時仙人鄧雲山乘雲出入驟
飛鸞峯頭玉女粲玉齒搗衣碣畔憑雕闌開母少姨並相過時聞
雜珮聲珊珊石上萑蒲生九節溪邊巨勝長闌干山頭有仙山更
好方壇古鼎燒金丹偶然遊戲出幻景縱橫轉側留與人間爲殊
觀霞梯高無極僊道何盤盤那不手携筇竹杖風清兩腋生羽翰
隨意雙峯選石坐碧桃花開當未殘便程有期未敢去仙宮咫尺
躋登難林中風簌簌塔下露溥溥空庭坐對青山暮少焉雲峯缺
處冰蟾湧一丸邱壑臥遊茲亦足目見雖夥口莫殫寄謝山中猿
鶴伴詰朝吾欲理歸鞍

渡洛水作

蔣漣

纔出青山郭還臨古渡頭波聲連兩岸旛影洛中流節近安期禊
人登郭泰舟飄然心不繫萬像正清幽

鞏縣東看隔水桃花

張漢府尹

桃花能綠柳能紅互影含光晚日融四水交流山盡處三春一半
客愁中尋常島嶼仙源出咫尺煙雲驛路通竟敢題詩詩聖里為
憐風物鞏城東

黑石關題壁

張漢府尹

有水嶽嶽有石齒齒我數乘槎往來於此但記姓名功無足紀萬
山之上萬山之下杜當陽侯意何為者問彼身後名生前酒盃孰

鞏縣志

第六冊 卷之十九 藝文下 二十三

河南商務印刷所印

真假

詩聖祠

張漢

天縱詩將聖人驚筆有神禹臯元始志寒餒竟終身廟祀忘鄉里
石文記水濱辨香吾所重此地獨尊親以上縣志

石窟寺

呂謙恆

匹馬倦猶往啼鶯聲自和客來樵徑少松覆澗雲多奧蹟占興廢
孤遊寄嘯歌偶逢田父至話向北山阿詩要集

杜工部故里

桑調元

青山入鞏洛秀色超塵寰鍾英產詩老悲歌成史編契稷輒自許
高李空隨肩東郊傷瘦馬西川拜杜鵑我行敬草樹式此南瑤灣

嗚呼斯人逝吟者無其賢

三田故里

桑調元

三田如荆樹本自懼同株如何中離異頓使連枝枯離者輒復合
枯者仍榮敷遺風成雍睦足爲鄉里模曠林不相能帝遣各一區
歷山憂未解于田泣嗚嗚周公與管蔡零雨涕淚俱可堪粟布謠
漢文心煩紆有生遇乖違飲痛無賢愚李樹代桃僵交讓同悲歎
相輝良不易華萼愁蕭疎精誠感草木涕下沾衣襦

望宋陵作

桑調元

洛水春蕩涵邙山高崔嵬山水映終古人事多興衰陳橋黃袍擁
鼎業東京開羣姦不破碎靖康釀奇災宋社旣南遷良嶽生蒿萊
盤回七陵氣蕭瑟蒼山隈臯亭飛白燕舟覆無遺骸江東燐火冷
鬼哭冬青哀升高睇珠邱濟決隔風埃其誰腸木石不識昆明灰

轘轅

桑調元

飛雲過轘轅山蹊翠曲折溪澗匯湍淙春流鳴決決迤度綰嵩橋
橫波臥雌蜺麥疇綠如染葱蒨藹可悅坦修馳道通峭隘鏗嶸嶸
沙平蔓嶺口石滅古車轍來往遵夷庚無復嚴關設惟瞻少室峯
青山粲行列

以上嵩山集

杜工部祠

呂守曾

邙嶺東來勢不齊殘碑屹立河之西金薜剝落字難捫空來繫馬
綠楊枝鷄皮野老相邀坐淡水濃陰憩少時指點路東新廟堂建

自周南張大史額曰詩聖杜工部當年篤生在此里天地間氣鍾
一身穆然詩思含真宰一飢不敢忘君國可但區區驚神鬼新安
石壕恣苦吟西去北征徒憂死後世詩人皆師承契合非詩以性
始太史名集傳河洛爲聖者徒應如此有唐到今已千年請爲太

史屈一指

松坪詩神

聚山園

姚爾申

東園肄業地風雨蔽數椽遙望五乳秀近窺白雪巔風光圍斗室
衆壑與塔連春和聽鳥啼秋深看鹿眠晴明文物景陰雲太古天
經歲覽勝槩幽奇總無邊端居茅檐裏頓爾忘塵緣游心仁義府
畀我方寸田冬裘與夏葛奚復羨餘錢爲憶陶靖節樂以忘其年

嵩縣志

第六册

卷之十九 藝文下 一二十五

河南商務印刷所印

本

登紫金峯

劉高青
邑令

乞休猶復此羈栖指點名山喜共躋曲徑籠葱芳草合層臺縹緲
白雲低遲遲霽景穿書幌漠漠青陰護畦乘興盤桓渾不厭後
遊還擬細留題

青龍山洞

孫汝工

携筇信步入山隈古洞幽深翠栢栽路向荒陰留白雪門臨石磴
長青苔塵封佛像無今昔遊歷人踪有去來閒覓殘碑墓古篆夕
陽欹下幾徘徊

將夕洛水上

曹鵬翊

傍晚蒼茫意何知造物閑波搖西落日影動北邙山暮鳥鳴前渡
歸樵走下灣吾生波浪裏淡淡解愁顏

石窟寺

焦侗

淼淼長川天際來急流迴處寺門開洞深蘿薜疑無路境入烟霞
別有臺殿角山泉常濺雨壁間石像半侵苔逢僧偶借蒲團坐話
到無心萬想灰

夏日竹林寺覓竹栽

趙作人

竹院行來暑氣蘇問僧肯乞此君無數竿移種茅簷下風雨瀟瀟
伴老夫以上舊志

小憩亭

陳龍章邑令

十載芝田轉眼過茅亭小築近岩阿携來綠綺隨身久醉後青山
入夢多微雨頻翻栽菊譜薰風時送採蓮歌莫嫌斗室惟容膝且
免星軺動薜蘿

補遺

嚴子陵祠

呂履恒

鞏邑東來淨路塵子陵祠畔正芳春客星不與炎灰滅一代流風
賴故人

田氏紫荆里

翁志琦

田氏遺墟沒草萊春風猶見紫荆開願攜當日連枝種分與人間
處處栽

鞏縣志卷之十九終